

REGIONAL NEWS BULLETIN
HEADLINES (EVENING)

Date – 28/02/2025

Time - 18:30 -18:40Hrs

- Horticulture Minister Prof Lalnilawma chuan Mizorama kuthnathawkute din khawchhuah theih nan state pawnaw thawn chhuah tlak wine siam tha a tih thu a sawi.
- Eptu party ten kuthnathawkute thar sawhthing a chhia tia sawi chungchangah sorkar an dem tih an sawi.
- Vawiin khan ram pumah National Science Day hman a ni.
- Union Health & Family Welfare Minister JP Nadda-a'n kumin chhunga India ram atanga TB natna umbo turin theihtawp chhuah a ni, a ti .

<><><>

Horticulture Minister Prof Lalnilawma chuan Mizorama kuthnathawkute din khawchhuah theih nan state pawnaw thawn chhuah tlak wine siam tha a tih thu a sawi.

Vawiina Mizoram Horticulture Service Association General Conference vawi 27-na Tourist Lodge Chaltlang, Aizawl-a neihah thusawiin Pu Lalnilawma chuan Mizorama thei leh thlai hrang hrang thar chhuahte hmanga wine siamchhuah chu a kaihruai Horticulture department chuan hmachhawpah a nei tih a sawi a, Mizorama kuthnathawkute din khawchhuah theih nan Mizorama zawrh chhuah tur chauh ni lovin, state pawnaw thawn chhuah tlak wine siam tha a tih thu a sawi a ni.

Byte: Horticulture Minister Prof Lalnilawma

Minister chuan Horticulture department hmalakna avangin thlai thar chhuah lamah Mizoramin hmasawnna nasa tak a hmuh mek thu leh thlai thar chhuahte hlawk zawka hrall a nih theih nana thlai senghnu sawngbawl dan, Post harvest lama hmalakna leh hmachhawp awm mek te sawiin- dragon fruit powder siamchhuah leh thlai panga- sawhthing, Mizo hmarchate, sapthei, dragon fruit leh lakhuihthei hrallchhuahnaah Reliance company te nena an thawh ho mek thu te a sawi a, hma an sawn zel theih nan thawktute chu a ngai renga kal lovin, ngaihtuahna ti thar thei, innovative idea nei zel turin a fuih a, an hmalakna reng rengah kuthnathawkuten hlawkna an neih theih nan theihtawp chhuah zel turin a fuih bawk a ni.

<><><>

AGRI MINISTER

Agriculture Minister Pu PC.Vanlaluata chuan FOCUS Project hnuiai MUALKAWI-TUIRINI REHABILITATION LINK ROAD vawiin khan a hawng a. He Link Road hawnna inkhawm tawi hi Tuirini kam, Baktawngah hman a ni.

Hawnna thu sawiin Agriculture Minister Pu PC. Vanlaluata chuan a bial chhunga FOCUS ten Link Road tha tak, nul leh huan siam chhungkaw 100 dawnin an chhawr tur an sial zo chu lawmawm a tih thu sawiin, hna tha taka thawktu Vinco Construction chungah pawh lawmthu a sawi bawk. Minister Mizoram district hrang hrang a kalnaah kuthnathawkku ten an mamawh an thlen tam ber chu Link Road hi a ni, a ti. Tunah hian Link Road sial sak tura dilna hi 3000 vel a lut tawh niin Agrisulture Minister chuan a sawi a ni.

PMU-FOCUS JE Pu T. Vanlalzara sawi danin, Link Road kawng thui zawng hi 4.6Km a ni a, kawng siam nan hian cheng vbc 3 nuai 33 sing 4 & 5,528/- sen a ni.

LS MP

Lok Sabha member Pu Richard Vanlalhmangaiha chuan Vairengte College building sakna tur lungphum vawiin khan a phum a, Vairengte College chu Mizoram leh Assam ramri a awm a nih angin, State pahnih te tan in unau-na tha tak siamtua nih a rin thu a sawi.

Lungphum phumna hun hi Vairengte College Governing Body Chairman Pu H.Vanlalbiakzauva, Vairengte SDO(C) chuan a kaihruai a, MP chuan thusawiin, College awmna hmun chu remchang a tih thu leh ramri a State pahnihte inrintawm theih tura College lian tak leh changtlung tak ni thei se a duh thu a sawi a, State pahnihte inunauna atan pawh thil pawimawh tak nia a hriat thu a sawi bawk. College sakna turah pawh theihtawp chhuah a inhuamthu sawiin, central lamah pawh fund hrang hrang a awm thin thu leh CSR Fund pawh haichhuah tur a awm a rin thu a sawi a, Building sakna tur an hmu a nih pawhin tha taka sak anih theih nan thawktute pawh an inpek a ngai dawn hle a ni a ti bawk. State sorkar a pachhia a, thawktu lamah pawh khawtlang hruaitute nen thawhhona tha a awm zel theih a beisei thu a sawi bawk.

He hunah hian Vairengte Pvt College Principal Dr. Lalsiamhnuna bakah College Governing Body hruaitute pawhin thu an sawi bawk.

BJP MIZORAM

BJP Mizoram chuan ZPM sorkar chu kuthnathawktute hmakhua ngaia sawhthing leitu Reliance Company-te inbiak rem pui dan ngaihtuah tur ah an ngai tih an sawi.

BJP Mizoram chuan thuchhuah siamin, tunhnaia Sawhthing thar tute'n an Sawhthing thar an hrall kawngah an thar chhuah atanga tlem tê tê chauh an leisak theih lai a, kuthnathawktute beidawnna leh lungngaihna tizual tura, Reliance Company te'na an Sawhthing lei chungchang a sawhthing tha tawklo thawn anga an sawi chu a pawi an ti a, hemi chungchanga ZPM-in Kuthnathawktute thlavang hauh lova, a diriam zawng leh hmusit zawngin thuchhuah an nei zui zawk tih sawiin an chet dan chu an dem takzet an ti.

Sawhthing thalo deuhte pawh thawn zingah hian lo awm pawh ni se, kuthnathawktute hmakhua ngaia Reliance Company-te hi inbiak remna neih pui dan an ngaihtuah tur ah BJP Mizoram chuan an ngai a, an Flagship Prog tihhlawhtlinna leh hlawhchhamna a mawhphur tu atana kuthnathawktute mawh phurhnaa an dah daih mai chu an Flagship Programme ah an chian loh zia lanna a ni a, Sorkar chhunzawm zel tlak lo hial ah BJP Mizoram chuan a ngai a ni, an ti.

MPCC President Pu Lal Thanzara chuan Sawhthing chhia hrall chungchangah sorkarin mawhphurhna la lova Sailam leh Chamring in a khaw puma an hmingchhiat phah chu a pawiin a vanduaithlak a ni, a ti a. Export leh Import chungchangah an thil lei chu a lo tha tawk lo a nih chuan, a tha tawk lo a thliar ang a, a tha tawk a dah hrang ang a, a silfai ngai a silfai ang a, a leitu tur ten an duh tur ang ngeiin a sawngbawl tur a ni a ti a, tuna ZPM in House chhunga an aupui dan chu Kuthnathawk tute hmuhsitna a ni a, a ti.

Mizo Hnam Run chhung inkawm vawiina neihah an party Gen Secy Pu VL. Krosshnehzova chuan tunlaia sorkarin sawhthing a lei chungchangah, rim leh hah taka kuthna thawktuten dem an hlawh mai chu a pawi hle a ni a ti a. Rim taka thawktute avanga leitur nei thei mai zawk an ni a. Zirtira kawhmuhtu tur zawkten an

tihtur an tihloh avang a dem tur zawk an ni a. Thawktute demlovin, an zak anih chuan a changtu minister leh board chairman te bang ngam zawk se, a ti. ZPM chu thuneihna duh avanga pawl hrang hrang atanga tlantau awmkhawm an ni a. An insawi anga awmloh chu an nihna tak a ni, a ti bawk.

<><><>

AIR NEWS ON SOCIAL MEDIA

Chanchinhar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinhar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinhar puan leh a ni ang.

<><><>

NATIONAL SCIENCE DAY

Vawiin khan ram pumah National Science Day hman a ni a, physics thiam hmingthang, Sir C.V Raman-a'n 'Raman Effect' a hmuhchhuah hriatreng nan kum tin Feb ni 28 hi National Science Day ah hman thin a ni a, he a thil hmuhchhuah avang hian Sir Raman-a hian kum 1930 khan Nobel Prize a dawng a ni.

He ni pual hian ramchhung hmun hrang hrangah science lama kawng hrang hranga ramin hma a sawn dan puanzarna ni atan hman a ni a, Prime Minister Narendra Modi-a'n he ni pual hian ram mipuite hnenah duhsakna chibai a hlan a ni.

<><><>

NATIONAL SCIENCE DAY

Mizoramah hmun thenkhatah National Science Day hman a ni a, Mizoram Science, Technology & Innovation Council (MISTIC) buatsaihin National Science Day 2025 lawmna hun Synod Conference Centre, Mission Veng-ah neih a ni a. He hun hi Mizoram University Registrar Prof. Lalnundangan a hmanpui a,

Prof. Lalnundanga chuan zirlaite chu fuihin science chu subject har tak ni lovin uluk leh taima taka zir ngai a nih zawk thu a hrilh a. Keimahni theuha thiamna leh remhriatna te ngaihtuah chhuak thiam tura in zir turin a fuihin, India sorkar hnuaih zirlaite puihna scheme hrang hrang a tam thu sawiin, zirlai kalkhawmte chu hmang tangkaia bawhzui turin a hrilh. Zirtirtu lo kalte pawh zirlaite tana remchanna siamsaka, hamthatna hrang hrangte haichhuahpui turin a chah bawk.

National Science Day lawmna pual hian Exhibition buatsaih a ni a, Mizo thalai Innovator ten an thil siamchhuahte pho chhuakin kal khawmte tan sawi fiahna leh sawihona te neih a ni.

He ni lawmnaah hian sikul zirlaite, college leh university zirlaite, Science NGO hrang hrang te, Science Institution hrang hrangte bakah Science lama tui sawmbik dangte an tel a ni.

Serchhipah chuan Govt Serchhip College ah 'National Science Day 2025' pualin 'Pradhan Mantri Formalisation of Micro Food Processing Enterprises Scheme(PMFME) - Seminar on Food Micro-processing Entrepreneurship Programme' hman a ni.

Mizoram Food and Allied Industries Corporation Limited (MIFCO) leh Govt Serchhip Collee a Science Department te tangkawp buatsaih a ni a, MIFCO Chairman Pu Thazuala Rawite chuan he hunah hian thusawiin PMFME hnuaih India sawrkarin ram mipuite tan a tam thei ang ber eitur tha leh thianghlim leh hrisel siamchuahna tur programme thatak a duan thu leh chumi kengkawh tu (Implentating Agency) atan State Project Monitoring Unit (SPMU)te ruahman annih thu a sawi a.

PMFME Scheme chu atawp hmaa tangkai thei ang bera hmang turin College zirlai thalai mithiamte chu beisei annih thu leh Serchhip chu ram laili a awm, Agriculture & Horticulture product hmuh/lak zung zung na awlsam tak nih thute, PMFME hnuiah kan ram thlai thar atanga eitur tha leh tuihnai zawk siamchhuah theih anih thute sawiin, chumi atana tih takzet leh tumruhna nen a bei duh zirlai leh thalaite tan MIFCO an awm reng thu leh an inhawn reng thu a sawi a ni.

Sorkar laipui scheme PMFME hnuiah hian Food Micro-processing Entrepreneurship lam tui leh hmang tangkai duh te tan a thlawna Training kalpui anih bakah zaa 35 Subsidy awm Bank Loan pawh pek theih anni bawk a ni.

<><><>

TB ELIMINATION CAMPAIGN

Union Health & Family Welfare Minister JP Nadda-a'n kumin chhunga India ram atanga TB natna umbo turin theihtawp chhuah a ni, a ti a, khawvelin kum 2030-ah TB natna umbo hman tum mahse India atang erawh chuan kumin chhungan umbo theih beisei a ni, a ti.

Odisha-a Puri khawpuia tukina National Summit on Good, Replicable Practices and Innovation in Public Healthcare System in India vawi 9-na a hawnna-ah he thu hi sawiin Pu Nadda chuan kum 2017-a sorkarin health policy thar a kalpui hnuah thil tam tak siam that a ni, a ti a, nu nauchunga thi, Maternal Mortality Rate leh nausen thi, Infant Mortality Rate pawh a letin a tlahniam tawh a ni, a ti a, sikserh natna pawh thui tak khuahkhirh theih a ni tawh a ni, a ti.

Cancer veite tan, an vei a ni tih hmuhchhuah atanga ni 30 chhunga inenkawlina an dawn theihna tur daycare center, district zawng zawngah din tum anih thu leh ram mipui zaa 90-in Ayushman Bharat Yojana an chhawr tangkai thu a sawi bawk.

<><><>